

邨園全書

吳舫

門錄

畫

光緒戊申秋仲
長沙葉氏校刊

夫揚逸采於彤奩則舞繡歌雲春生著手緬瑰聞於紫曲
則酒龍詩虎聽到低頭矧以眉嫵西家苧蘿村好燕支南
部花草宮畱晴漪奩淨影盡生憐海湧螺青山還含笑地
鍾佳麗可稽風土外編紀廣治游爲補水天閒話則有谿
名芍藥波蕩狂香兜號蓮花鏡支中婦小樓如畫楊柳能
藏雙槳若飛鴛鴦欲學吹花嚼蕊人識柳枝之門騎魚撒
波家肄桃根之櫂首不畫鷁茵俱設熊簾額則懸珠招風
疏櫺則碾水受月靡不移春有檻泊揀花深遏雲能歌歸
遲雨暮每當節臨兒女天開綺羅水嬉繡野妖侶縟川倚
旄旗以耀質竦鳬燕之輕軀手玉混塵眉煙連山望之若
仙恍臨澧浦坐來雖近疑逢洛濱又況香迴一洲席芳十

步玉纖遞雲英之漿。柁樓出胡麻之飯。尊浮綠螳。瑤雪再
酬。脯擘青麟。雕槃屢薦。匿窻之眉語。乍度射覆之心字。頻
盟脆板。敲紅罇枝。鶯近深栖。褪綠映燭蛾。彎靡曼若此。宕
往奚持。別有香能迷洞。羹不閉門。花下一關。抽簪可斂柳
邊深巷。繫馬曾經。纔攀珠箔。蘭笑相迎。猶隔畫簾。釵聲遙
辨。生成曆淺。只解拈花競學。粧慵有時。擁髻舞掌之腰尺。
五生蓮之步。雙弓或指銀箏。比歲或倚錦瑟。量身靡勿屏
間。拈豆紅映脣珠。堦下樹萱綠。舒眉萼。笙篴常繫。擣菹不
收晨粧。甫竟卯酒。旋中鴨心駐。燠鷗斑。裊雲晝靜。瓊閨茶
呼鸚鵡。宵闌曲院局亂。獨兒斯實。調笑無虐。要是清遊所
期。至若薦荆臺之枕席。瓊闥同嬉。抱秦女之袞裯。玉樓深

貯真箇消魂一背輪意投香有所照春開屏盈盈迴抱斜
身倚幃旦旦申盟引臂替枕初藏媚蝶夢定行雲枕剗神
雞起仍踏日樂未央哉蕩無度矣于是庭栽梔子咒出同
心籠畜迦陵教呼並命出則蜂蜨俱隨入則鰈鷁相矢璧
車聯載細馬約馱纏錦博歡銀河思卷布金買笑銅山欲
移迨夫珠甘論斛悔起遲來香可名街激成豪舉始怨鴆
媒寡信將疑鰓誓無靈猶且飄煙抱月爭歌楊白花來曳
雪牽雲不放陸郎騅逝遂使映門柳鞦學迴碧玉之腰拂
面花飛替寄紅綃之淚斯固入天魔嬈舍不難戒隳阿難
值色界情天要使魂銷地媪者也友人西溪文憐隱霧翼
息搏雲惜芳序之易闌眷懽悰之多逝煙花三月重感羈

棲絲竹中年政須陶寫爰以粲花之筆抒其繪水之思倡
條冶葉區別云嚴小白長紅評泊惟允緯以苦心雨飛天
女挹其奇氣虹吐美人加以卻月皺煙眉堪撰史搓酥滴
粉口欲生香溫尉錦鞋陳思羅襪麗句間登吉光時見張
氏粧樓之記陸家小名之錄並傳可信媲美無難用以振
挽孤緒洵足滌蕩沈疴矣僕則絮已沾泥花從著袂眉參
深淺淚漬衫青蓬感飄搖酒驚鬢綠間情偶作性用持孤
憤幽憂綺語未除旨豈慕陰淫案衍庶幾愁壘之降是鄉
足老敢謂傾城之悅此中有人以側豔之時儉致糠粃之
見播詞稽淮海我慙井水能歌詩賭黃河君定旗亭遍唱
若問一池春水底事干卿試參四壁秋波會當悟爾乙丑

橘春鏡卿沈廷昭序

花月新聞水天間話煙花南部之錄臙脂北里之記莫不
副在縹緗傳諸茗玉揆其用意略有二端東城父老曾見
開寶之繁華南內王孫猶有承平之故態世易時移哀來
樂往十二樓臺故釘已失二八迭代昔夢宛然勾闌打野
亦入武林之遺事瑤光奪堦並載洛陽之伽藍意等夢華
流分野史此其一也其或才人失職蕩子中年有離騷佚
女之幽情作醇酒婦人之生活寄豎可笑憔悴自傷牧之
豪宕感杜秋而命篇少陵老大爲公孫而隕涕張泌無聊
粧樓輯記龜蒙有託侍兒錄名一宵璧月遂有篇章十里
珠簾任傳薄倖又其一也非此寄託不關勸懲煙墨雖驅
風雅弗尙西溪山人吳門畫舫錄者時際昌明地當饒樂

肥魚大酒之場紙醉金迷之窟游閑公子無忌知名窈窕
佳人莫愁新字譜集羣芳香稱一國爲之暝寫恐異前聞
然而風花易散茵溷堪憐蓮出青泥心含淨果桃開露井
命短東風倚風含雪沈下賢之所低徊抱月飄煙李玉溪
因而惆悵當夫絃么管脆玉泣珠啼冠上釵飛掌中鞋拓
鐙紅酒綠鉤弋拳開枕暱幃低淳于褊解謂當樂死誓比
長生及乎西曲車回汝南雞唱滿堂人散百年歌殘烏啼
昨夜之樓鶯囀誰家之樹青春已去黃衫不來變有懽聞
詞傳儂懊維兒女之癡情亦人天所動色假茲鴛牒聊記
花牌曼睩騰光波瀾在目傳紅對鏡曲折爲眉亦憐才之
盛心言情之極致也僕本恨人臣原好色姪坊魔席亦或

我聞影事前塵久微佛說屬引端之荒言作懺餘之綺語
若夫溫歧少日詩多側豔成式當年詞名播播老矣自慙
君無取爾已嘉慶丙寅人日頻伽居士郭麐敘

敘

此梅鼎祚青泥蓮花記余懷板橋雜記之續也然而煙花之錄拾自隋遺教坊之記昉於唐作一則見收於史一則并附于經似乎結想螭蛾馳音桑濮偶然陶寫何礙風雅若夫僕者綺語之債已懣于心縮屋之貞可信于友豈有烏蟾告邁齒髮兼彫重參天女之禪來對玉臺之簿者乎乃觀是編竊又不能無感焉夫論黃土搏人之說則貴賤何常作飛花墜地之觀則茵溷立判既已沈淪苦相轉輾情塵脫泥絮其何因拔火蓮而莫得紅粉之夢終付飄流青樓之名多逢薄倖鴟媒徒告于佚女鴛牒難諧于使者甚至鄱陽暴謔郭重食言柳被風欺蕉因雨卷吁其悴矣

傷如之何吳中者佳麗之鄉游冶所習管語絲哇之奏眼花耳熱之娛每當橋畔行春溪頭消夏一舟泛夕單檻凭涼幾幾乎誑漁子以迷花蕩姮娥而入月焉然而富商豪估罕文字之談膩鼎腥砧溷薌澤之美自非詞人刮目名士傾衿但唱懊儂誰歌歡子憐才之意當不其然夫委真性於空花鑠元神於虛牝誠攝生所憂也辱才人以廝養蒙西子以不潔又造物之憾也爰乃抽徐陵之筆書薛濤之箋察眉黛之可憐約釵光而使聚莫不娛光眇視冶服成溫雖豔溢煙毫而義歸輦鑑綺懷有託雅什同登本之美人香草之思極乎煙波畫船之趣匪惟承平之盛抑亦樂府之遺也或謂佛貴淨因禪懲欲染蹈茲口業於意云

何不知帝釋宮中亦陳妓樂華鬘天上特開女市吾請洞
觀究竟廣說人天合游戲之文章作幻泡之譬喻當此風
花易過水月重來亭坐可中鐘催夜半所謂楞嚴十種梵
志一壺者卽色卽空我聞如是而已嘉慶丙寅夏五月香
醉山南禪客吳錫麒撰

